



Nuuk 18.0ktober 2009

Inatsisartut suleriaasianni § 36 immikkoortoq 1 naapertorlugu matumuuna Naalakkersuisunut apeqquteqarpunga imaattumik.

**Naalakkersuisunut apeqqut: Kalaalimerngit qerisut sooq kalaalimineerniarfimmi tuniarneqarsinnaanngillat?**

(Medlem af Inatsisartut Hans Enoksen, Siumut)

**Tunnngavilersuut:**

Kalaaliminnerniarfimmi umimmaat tuttullu qerisut suna pissutigalugu tuniarneqarsinnaanngillat assersuutissamillu taasaqassaanga.

Kangerlussuarmit sinerissami illoqarfiit ilaannut piniartoq tuniniaaniartoq tuniniagassaminik umimmannik tuttunillu qerisunik timmisartukkut nassiussiniartoq ilisimatinneqarsimavoq taamaalorsinnaanngitsoq qerisunik nassiussigaluaruni aammalu kalaalimineerniarfinni tuniniaassagaluaruni inatsisinik uniussammat.

Taamaaliussagaluarunilu arsaarneqassasoq, sooq taamatut piunasaqartoqarnersoq assut paaserusuppara, tassami ukiorpassuarni taamatut tuniniaasarneq ingerlanneqarnikuummat, aammalu qerisunik nalinginnaasumik inuit akornanni nassiussisarnerit ingerlanneqartarlutik, assullu paasiuminaatsippara suut sunalu pillugu inerteqqutaanersut.

Ersarissumik suut unioqqutinneqarsimanersut, suullu piunasaqaataanersut inatsisillu suut aporfionersut, aporfiusullu inatsimmik allannguinerimik kinguneqarsinnaasut Naalakkersuisunik allannortinneqalersaanersut ilanngullugit paaserusuppakka akineqaqqullugillu.

Tassa ersarissumik uani pivakka Kalaalimerngit qerisut sooq kalaalimineerniarfinni tuniarneqarsinnaanngitsumik uumasut nakorsaata piunasaqarnera sumik tunnngaveqarnersoq.